

小倉山房文集

小倉山房文集卷三

錢唐袁枚子才

文華殿大學士尹文端公神道碑

乾隆三十六年二月文華殿大學士尹公薨于位

天子震悼加贈太保謚文端崇祀賢良次年三月公子
慶玉等扶柩塋于遼東遵公遺命墓勿爲碑其門下士
袁枚泣而言曰古勲華之盛皆于畢襲之訐謨中見之
我國家治隆唐虞天生文端公熙帝之載垂五十年
四夷九州聞公慕公萬頸胥延矣倘生平忠勛灑然就
湮于公謙德可也其何以佐聖清之光明哉第公奏
稿盡焚密勿語外罔聞知而枚又生晚靡能記憶謹就

受業以來。隅坐時齒牙所及。諸軍民屬吏所祝稱者。鋪揚之以聲于貞石。或亦左氏所謂達而道者耶。諸公子曰。唯唯。乃撫其梗概而銘之曰。公諱繼善。字元長。晚自號望山。滿洲鑲黃旗人。世居遼東。父泰。罷祭酒家居。世宗爲藩王。祭長白山。召與語。悅之。問有子仕乎。曰。第五子繼善。舉京兆。曰。當令見我。及公試禮部。將謁雍邸而

聖祖崩。世宗卽皇帝位。乃中止。公亦登雍正元年進士。引見。世宗喜曰。汝卽尹泰子耶。果大器也。選入翰林。而召祭酒公爲工部侍郎。尋遷東閣大學士。怡親王請公爲記室。上許之。天寒。衣羊裘從王。王憐其貧。賜

青狐一襲奏署戶部貴州司郎中當是時廣東總督孔
毓珣與巡撫楊文乾不相中肇高廉道王士俊者楊所
薦也伺楊入覲劾王下獄公承命往鞠得其情世
宗深嘉之未復命授廣東按察使甫抵任遷副總河未
半年遷江蘇巡撫仍兼河務事時雍正六年也江蘇漕
政抗弊公奏衛丁州縣費各有需嗣後請米一石收費
六分先給官丁使無不足然后一裁以法又奏平糶盈
餘非公家之利應存縣庫又奏撤水師營而增沙船巡
海又奏鹽院伊拉齊不法請褫職擒問世宗悉允所
請懼聲接于衢七年署河道總督九年署江南總督未
一年雲南元江苗反調雲貴廣西三省總督公白哲少

鬚麋豐頤大口聲清揚遠聞著體紅癍如硃砂鮮目秀而慈長寸許釋褐五年卽任封疆年裁三十餘遇事鏡燭犀剖八面瑩徹而和顏接物雖素不喜者亦必寒暄周旋常一月間兼攝將軍提督巡撫河漕鹽政上下兩江學政等官九印彪列簿書填委而公判決慨然無瘁容亦無驕色猶與諸生論文課詩以故民相傳折服聞呼騶過爭欣欣然走一二里追輿望影以爲天人其督南河也上命開天然壩公不可適浙督李衛入覲過清江傳旨嚴飭且云衛已奏明黃水小開固毋妨公覆奏李衛不問河身之深淺而但問河水之小大非知河者也倘河淺壩開宣流太過則湖水弱難以敵黃之

強方草奏時幕中客齊爲公危有治裝求去者公不爲動。世宗喜曰卿有定見朕復何憂。輟御衣冠賜公而加公太子太保其調雲貴入覲也。江南災河東總督田文鏡欲夸所屬之豐請漕東粟助賑按察使唐綏祖密奏東省亦災粟宜留。世宗問公公奏如綏祖言。

世宗曰如卿言山東誠災第綏祖田文鏡所薦不宜異議。公曰臣聞古人有申公憲以報私恩者若臣作田文鏡只知感愧不知嫌怨時唐禍幾不測以公解得免而公初不識唐也。公旣到滇知前督高其倬雖受譴而老成有識乃虛已諮詢高亦感公意備告款要遂率總兵楊國華董芳等分路進兵破之擒其魁老常小等元江

平今上登極之二年補刑部尚書四年教習庶吉士

五年總督川陝八年江南災調兩江十三年調廣東不

果補吏部尚書協辦大學士金川用兵乘傳與忠勇公

傅恒詣軍前受降畢仍督川陝十六年調兩江十九年

河決命督南河河平命視師伊犁半途追還仍督

兩江二十九年上召公爲慶七十賜譙于第拜文華

殿大學士仍攝總督次年還朝相天子七年薨公毅

而能擾機牙四應上深知之凡糾紛盤錯事他大臣

能了者不命公既命公則皆棋危花險萬口禁聲人方

怯公無下手處而公紆徐料量如置器平地靡不帖妥

又如東風吹枯壤易改色凡一督雲貴三督川陝四督

江南而在江尤久前後三十餘年民相與父馴子伏每
聞公來老幼奔呼相賀公亦視江南如故鄉渡黃河輒
心開臨入閤時吏民環送悲號公不覺悽愴傷懷過村
橋野寺必流連小住慰勞送者不侵官不矯俗不畜怨
不通苞苴嚴束僉從所蒞肅然將有張施必集監司以
下屬曰我意如是諸君必駁我我解說則再駁之使萬
無可駁而後可行勿以總督語有所因循也以故公所
行鮮有敗事所理大獄雍正間江蘇積欠四百餘萬乾
隆間盧魯生偽稿及各郡叛逆邪教等案皆株引萬千
而公部居別白除苛解燒不妄戮一人先是十六年
天子南巡黃文襄公盱衡鴈色供張辦二十三年至三

十年公三迎。鑾熙熙然民不知徭役供張亦辦人以是服公之敏也。公清談干雲而尤長奏對。世宗嘗詔公曰汝知有督撫中當學者乎李衛鄂爾泰田文鏡是矣公應聲曰李衛臣學其勇不學其粗田文鏡臣學其勤不學其刻鄂爾泰大局好宜學處多然臣亦不學其慢也江蘇布政使某妄奏司胥侵歷年正供自矜嚴察公偏劾其寬縱曰某既知庫虧百萬而不能科別窮治何耶。上意釋命大學士劉統勲會同按覆事果虛俗傳公貌類佛而不喜佛法聞人才後進則傾衿推轂提訓率率每公餘一卷一燈如老諸生寒暑勿輟詩成喜人吟聽至頓挫處手爲拍張或半字未安必嚴改乃已。

以故清詞麗句雖專門名家自愧不如上嘗下詔云
本朝滿洲科目惟鄂爾泰尹繼善二人嗚呼榮哉故事
宰相抵任在翰林衙門公入相時所坐處卽公先人之
位公母徐氏側室也以公貴封一品夫人公側室張氏
以第二女爲皇八子妃亦封一品夫人充丙戌會試
總裁先一年而降旨皆異數也公本姓章佳氏先娶
耶氏再娶鄂氏俱封夫人乎某某
銘曰一事未行懽聲雷鳴問厥所由相感以誠一令裁
布趨迎滿路我知其故信之有素大哉夫子金粹玉溫
仇怨低首羗戎扶輪五行中土四時中春惟其育物所
以歸仁公嘗訓人人如履地不留有餘鮮不顛蹟人亦

指公公如大樹安寢其下使人可據羊腸業業公能游
之虎目猙獰公能柔之匿瑕藏疾公亦憂之摘果未熟
曰且留之及其覆矣轉相咎矣公亦無言笑而受矣貴
且彌恭老乃益聰乾乾日稷扶我皇風大鐘勿考大廉
勿表官久胡貧惟天了了十事要說姚崇忠愛公欲云
云探懷有待元齡遺表諫征高麗公竟生前抗顏陳詞
易簣猶視殘編斷紙曰性所耽惟文與史七十七年大
星歸矣如彼宣尼可止則止有子十三鄧家金紫罔不
東脩敦詩說禮遼水湯湯繞公墓堂江水悠悠望公來
遊二水之間知公俱到所到孰多江南有廟

武英殿大學士忠勤伯太保黃公神道碑

公姓黃名廷桂字丹崖正黃旗人年十九以材官引強從

聖祖出塞獵控飛猱落雙雕者二十餘年

世宗登極授宣化總兵四川提督甫至官卽奏設局辦治鎗砲鉛丸時西土無事而公豫籌同仕者笑之未幾西藏阿爾布托反公往敵千穀甲軍容山立賊大驚散走事聞世宗知公可大用命討雷波士司楊明義等擒其魁餘黨悉平亡何滇苗阿驢反圍叅將謝某於赤衣臺七日公率兵入大小涼山攻殺降下之乃還秋滇省烏蠻又反公軍川滇接壤處四路堵遏卒縛其酋

世宗大悅命總督四川川省地丁每兩耗二錢民苦之
公請每兩減一奏上報可卽

今皇上卽位之元年也俄而總督缺裁署天津總兵遷
古北口提督再遷甘肅巡撫其時邊省倉空地屢震新
渠寶豐幾不毛矣公符縣買籽種耕牛招民授田浚昌
澗渠灌之行二年兩邑富如初十三年春署陝甘總督
冬調江南十六年仍調陝甘十八年調四川二十年加
太子太保補武英殿大學士仍督陝甘當是時國家
禽達瓦齊方開闢伊犁威震萬國而投誠之阿睦爾撒
納叛入哈薩克回虜竊發襄勤伯鄂容安兵部尚書班
第死之天子震怒命大將軍永常兆惠等相繼出兵

公。以。爲。先。安。內。而。後。攘。外。外。夷。跳。梁。國。無。大。損。若。因。軍。
需。驛。騷。致。內。地。有。事。則。金。甌。玷。矣。乃。命。運。糧。車。十。家。抽。
一。厚。其。值。許。帶。什。物。貿。鬻。民。踴。躍。爭。先。慮。牛。運。妨。農。奏。
買。騾。分。布。口。內。外。民。耕。如。常。又。以。爲。凡。事。豫。則。立。糧。待。
盡。而。後。運。則。士。飢。馬。待。餒。而。後。補。則。戰。勦。乃。命。安。西。至。
哈。密。沿。路。開。池。畜。豆。馬。到。行。且。喂。以。故。馳。千。餘。里。愈。壯。
駐。防。臺。站。月。需。米。數。千。曰。吾。前。撫。蘭。時。曾。買。穀。三。百。萬。
石。分。貯。河。東。西。正。爲。此。耳。識。者。方。知。公。遠。謀。董。安。于。不。
是。過。也。逆。酋。已。瑪。等。叛。截。臺。驛。信。不。通。沙。克。都。爾。慢。吉。
一。支。就。賑。蘭。州。逼。近。肘。腋。巴。里。坤。大。震。公。遽。發。兵。三。千。
鎮。撫。之。奏。出。半。月。而。

命下如公言布政使蔣炳共事肅州公檄令回蘭州督賑奏出四日而

命下如公言公又擬奏大將軍兆惠以孤軍守阿克蘇無益宜早令回軍相機再進奏未出而

命下如公言公每有謀算動符聖意雖隔萬里如在目前以故

眷寵日隆加太保封忠勤伯世襲雲騎尉賜紅寶石

頂四團龍補服公素患咯血既理軍務中夜輒起或張目達旦致積勞成病病劇嘆語猶以馬馱糧運進勦擒賊諸務喃喃不絕官吏文武繞榻環聽爲之涕泣滿下一鼓而薨年六十九天子震悼賞賻無算柩還車

駕親奠諡文襄崇祀賢良公陰重強毅常稱事英主有
法若先有市惠好名黨援諸病爲上所知便行一好
事不得故生平寡笑語所在芒角專以招怨謗忤權貴
爲務孤行一意奉主而已及事關重大旁人平素舒
緩養名者束手不敢動而公輒以一疏得之或直薦其
戚里或保留人於臨斬決時或請豁軍需數百萬奏上
卽行海內駭服貌清奇長身鶴立額上瘤起如佛頂懸
珠者然見屬吏無溫顏質俛其過高坐不冠斜睨而涕
唾司道以下寒毛惕伏甚至股弁然喜人強項愈駁辨
愈喜理屈則從之或以此受目色督西川時外夷准噶
爾入關熬茶有悞奏入寇者天子命公發兵公封還

詔書奏不可已而果以悞聞調肅州馬駐防兵倚將軍
勢或不時給公奏之上命滿洲三品以下官許公杖
決由是令無不行居恒無他嗜好放衙畢手通鑑一編
而已子一人某福建糧道先公卒以某年某月葬公于
某

銘曰吾未見剛次莫如猛惟我文襄秉此以逞起宣化
終涼甘利西北不利東南莫鴟獍付崔楷貉子過老罷
卧天縱其鋒爲李橫衝孤捧紅日以行于空如繫虎鬚
牽不得動嗚呼竟以始終世之過人不履影而尤豫奪
常者其視此華表之穹隆

文淵閣大學士史文靖公神道碑

乾隆五年

天子命刑部尚書史公教習庶吉士教習 國書免課
而公命擬奏疏一通褒許甚盛嗣後趨函丈不待啓輒
入得與聞 本朝文獻

仁廟

世廟兩聖人所以致太平之隆與公生平受知恩遇談
洋洋盈耳於古大臣中酷愛姚元之蓋自況也後十年
枚再拜公於 賜第時公已作相而枚起病入都公教
之曰聞汝宰江寧有善政誠不負所言惜杜牧之未免
風流耳遠到者宜戒也嗚呼言猶在耳而公自此訣矣

今年五月十三日公薨於位 天子贈太保諡文靖命
翰林立傳樹碑於墓公之勲 天子爲揚其聲光銘公
者有大手筆在何俟門下一舊史官哉然弟子傳其師
各有所心得而不能自已謹廣其事于狀外而擬爲銘
曰公諱貽直字敬弦號鐵崖系出東漢溧陽壯侯世居
湖埭里徙夏莊父夔官官詹以文學清望伏海內公貴
贈如公官公十歲能詩十八舉京兆十九登進士入翰
林典試於滇督學於粵所至有聲爲掌院湯公右曾所
抑由檢討而贊書而諭德而侍講而庶子而學士優游
清秘不是一級者二十三年雍正元年大將軍年羹堯
平青海歸勢張甚黃韁紫駟絕馳道而行王公以下膝

地郊迎年過目不平視獨公長揖年望見大驚遽翻鞍
下曰是吾同年鐵崖耶扶上已所乘馬而已易他馬並
轡入章益門翼日補吏部侍郎尹順天世宗晝日三
接咨詢優獎公亦布露所畜勤施於四方乘傳訊雁平
道王寵閩令梅庭謨清釐直隸河南積案甄別閩省官
雖事秘外不能知而考覈平反輿論翕然公在世宗
時總督福建再督江南授都御史巡撫陝西在今上
時總督湖廣再督直隸加經筵講官戶工刑兵吏五部
尚書文淵閣大學士仍兼吏部尚書公生而徇通神識
超妙周巡六曹出入九鎮又復六十餘年以故所蒞處
如日破黑湯沃雪批沂紱要動中機宜常言天下辦事

人多解事人少深刻非明懈弛非寬交際非私協恭非
黨故公爲政行已無心寬猛耻矜苛廉一以持大體安
社稷爲務先是戍臺灣兵武弁送往動索番社頓遞公
改委臺鎮本標弊遂絕漳泉卑溼穀易朽公奏臺灣例
給兵米卽以四府穀運廈門碾發嗣後無角尖耗西安
無屯倉公請軍需剩穀十六萬爲貯歲饑屯民受賑如
一苗盜蒲寅山據梟頭山叛積十稔未平公設方畧命
總兵李椅禽其魁餘黨悉散容美土司稅輕改歸流後
稅增公請仍征原額獠猺歡呼督直隸未半年所題結
事九千六百餘 今上登極公首奏停開墾以杜浮冒
禁勸捐以正國體循資格以息奔競用科目以重科道

吏禮四衙門疏數千言 上在藩邸習聞 世宗稱公

及是愈信其賢悉允所奏因公入謁 梓宮召見溫諭

良久賜 世宗所遺鶯黃蟒衣四圍龍補服曰此 先

帝意也今朕君臣所共事卽 先帝事也卿其始終一

致公感謝嗚咽 上亦泣下不止公清標玉立眉目如

畫舉止詳華靴塵不沾衣主袍褶式皆內裁性強記尤

善清言雖莊語危論必多譬引饒風趣每早朝立宮門

槐柳下諸王貝勒卿貳翰詹環聽鐵崖相公道 三朝

舊事耆臣言行以至輿服車騎之儀適羅縷明暢如鳳

鳴九霄下風傾耳聞所未聞他大臣或懼言溫室言

咤不宣而公肆意逞詞談啁流速忌者亦不能中也乙

亥歲次子奕昂署甘肅布政公通書於巡撫鄂昌事聞
天子休公于家公出學舍後未嘗家食至是乃得掃墳
墓到兒時釣弋處召族人數千分俸置酒爲二疏故事
里中負簞笠者見公鄉音如故嫺睦有加咸從從奔趨
來看真宰相乃未幾而天子南巡仍召公入閣矣公
尤長奏對年羹堯伏誅窮治黨與世宗問汝亦年某
薦乎公免冠應聲曰薦臣者年羹堯用臣者皇上
世宗默然常奏事拜起舒遲上問卿老憊乎公曰
皇上到臣年當自知之上大笑時公年八十一矣公
少時撤金蓮燭成婚中年督兩江開府鄉里晚年再宴
鹿鳴瓊林周科目六十年之數天子賜詩褒美祝

太后萬壽入九老會圖形內府近古以來所未有也上
蔡令張球誣陷同官邵言綸總督田文鏡庇之世宗
命公往豫案覆發其奸田大慙大學士邁柱請開楚丹
河運米公力持不可浙督李衛約爲兄弟公嫌其不學
也謝之三人方柄用時撰其鋒者皆懼公獨棘棘不阿
其守正如此晚年恩禮愈隆肩輿入紫禁城陪祀不
與大寒暑不入閤湯沐小休卽齎物賜於家患風熱數
日曰吾本無疾而此中竭矣卽繕遺表薨子三人長奕
簪官翰林次奕昂廣東布政使次奕瓌知潞安府夫人
許氏先公卒合葬某
銘曰天球河圖西序雙陳阿衡太師朝不兩人奕奕史

公維嶽降神通峭風骨華重冠巾天生公來作百官表
表上頭銜公身可考帝賜公履作九州圖圖中禹甸
公盡馳驅勿矯勿隨有猷有爲雷霆之下談笑指麾垂
老雍容黃扉供奉主聖臣逸物希寵重堯禹盤匪義
軒露斐但厥于庭四方風動何必琯琯再叩其用伏波
談論王公意消奚斤老去善說先朝八十二年委化而
卒帝子奠酒千官執紼太常大烝與國無極惟予小子
奉詔受經隅坐請業有訓則聽褒其文才揚於王廷
小謫蓬山公爲涕零望奮澠池以振厥聲一朝墜隕君
將安仰絲竹前生山河音響見而知之典型不爽私製
碑銘以質泉壤

廣西巡撫金公神道碑

乾隆元年春枚起居叔父於廣西巡撫金公幕下見公
公奇枚狀貌命爲詩大異之當是時

天子詔舉博學鴻詞之士四方舉者每疏累數人多老
師宿儒公獨專爲一奏稱某年二十一歲賢才通明羽
儀景運應此選克稱語多溢美天下駭然想見其人廣
西自高爵以下至于流外驚來問訊亡何枚報罷公亦
以事去官後二年枚乞假歸娶拜公於安肅會日暮天
大雪公聞其至也喜曳杖走出及門迎且笑曰果然翰
林耶枚再拜公答拜命入見夫人五年枚再入都公之
兩子來曰璵玉振玉等不孝不能延先君之年今先君

薨葬有日矣。惟貞石之未書。翰林其銘先君哉。枚乃泣而言曰。公仕宦垂三十年。盛業若干枚。與兩郎君俱年少。知之難文之尤難。雖然。就所聞以光幽宮翰林事也。亦門生志也。不敢任。亦不敢辭。謹按公諱鉞。字震方。一字德山。祖友勝。本姓金。襲明金帶指揮。世居山東登州。流賊破城。友勝死之。存三歲兒。名延祚。太夫人余氏將死。屬諸側室。趙氏曰。守節經也。存孤權也。我行經汝行。權趙氏泣而頷之。舉兒至遼陽。轉適郭氏。旣長。從本朝入燕。歷任工部侍郎。生公。及公貴。始復姓。公通易理。善兵法。爲粵西布政使。奏州縣向例雖有繁簡。兩調而於所治處。分析未備。則人地難相宜。請分銜繁疲難四

條許督撫量才奏請。上嘉納焉。今直省所行自公始。
西隆州八達寨苗反。公討平之。奏免泗城六年舊稅。以
汎兵少。粵土。燕不治。乃行屯田法。設都司官駐柳州。與
民牛招之耕。教之技勇。每名給水田十畝。公田一旱田
三十畝。公田二存。公田租於社倉行之。期年。粵萊田萬
餘。於是天下人皆曰。公以一廣昌知縣莅任。五年。蒙
世宗皇帝擢太原知府。才三年。遷廣西按察使。才一月。
遷布政使。才三月。遷巡撫。今入粵者。望氣蔥蔥。然政行
民和大異時。昔然則。世宗非用人之驟也。其知人之
深也。公之自太原入覲也。方廷議耗羨歸公公奏不可。
世宗不悅曰。朕已定養廉矣。汝在官私官乎。公叩頭曰。

臣非爲官游說也從來財在上不如財在下州縣爲親
民之官寧使留其有餘養廉者養其家使知廉恥也家
有大小所定數詎能胥足一週公事動致俯張 皇上
之意豈不曰凡是官辦皆許開除正供但從司院案覆
以至戶部層層闕報銷甚難從此州縣恐多苟且之
政 皇上意在必行臣請養廉外多增公費或存縣或
存司倣北宋留州之法庶于事有濟會左都御史沈近
思持論與公合 世宗乃勅山西巡撫核公費章程巡
撫希 上意定數較他省爲優公撫廣西九年 今上
登極召補刑部侍郎治行時印券借司庫千金後任巡
撫楊超曾劾之罷職雜治居月餘楊招撫不已 上怒

曰朕以金鉞撫粵久恐有他故故置之獄今楊超曾數
來奏皆極細事是金鉞平日無可奏也免鉞罪以所借
銀賜之卽日寧公于家五年春薨薨後天子念公賢
授河南布政使吏部以爲公存也文書下其家叩門不
應鄰一叟出曰公亡三月矣乃奏明收詔嗚呼罪之
雪也雪之者必有人而公以加擠而得脫黜而起也起
之者必有人而公以身死而得官然則公之孤直與
天子之明聖可以見矣性仁儉而靜置古鐘一枚擊之
以招僮豎侍者聞鐘聲始往遣人至大同買妾詢爲宦
家女厚其資歸之嘗謂雲貴總督鄂公爾泰曰改土歸
流非計也異日常思我言公享年六十有三先娶繼氏

再娶陳氏俱誥封夫人

銘曰得。一少年。薦於皇天。我愧賈後。公居吳先。公之勲。庸寰海。所知灑水。湯湯我初見之。牙旗雨收。南衙畫長。每接從官。竊窺簾旁。口聿王事。誦我文章。行止儀狀。瑣屑。誇張。辦裝。非過。借祿。非貨。受彼搏拊。甘茲折挫。天子有恩。用公之魂。豫民泣涕。待公不至。僂指平生。第一知己。豈圖報公如是。而止。嗚呼蒼天。使我如此。我心匪石。墜於泉底。

湖北巡撫唐公神道碑

惟唐氏世居海陵再遷揚郡唐公季如知靈山縣鼎革時輸金贖兵中子女天祐有德大昌厥宗再傳生公公行六諱綏祖字孺懷號我村諸昆歷翰林觀察司馬諸官而先生官尤尊舉康熙丁酉科封邱受知河東總督田文鏡從縣令遷歸德守濟東道山東按察使田以苛廉聞天下而公又精神淵著修下而馮人望見畏之以故共事者爭相搆喉凡四落職三對簿沒產頌繫勢洶洶疑不能再脫而公卒無恙卒起用以官壽終知封邱時兩漁戶報盜失一袴一斧公疑之拘漁戶往勘漁戶卽盜也柘城盜供火伴某公疑之命侍者易衣就質盜

指曰是也公大笑鞠之乃爲役所教並盜非是守歸德
時離縣民羅二被殺妻張氏訴賀某仇害獄已具矣公
廉得張與叔姦手絞其夫賀得釋聊城民傳世友攜兒
摘棗傷卧道旁過者詢之曰俺兒聲終氣絕人縛其兒
鳴官獄已具矣公廉得樹主所毆呼俺兒者戀其子也
兒免極刑爲山東按察使時鄒城某殺人詭家奴白縊獄
已具矣公疑券新鞠他奴死者故石匠非奴也毆非縊
也寃始雪爲廣西布政使時粵西桑江苗叛撫軍獲僞
軍師黃某議遣官招安公不可曰彼若執官而欲易其
軍師奈何遂進兵旣而謀者言苗已張繩待矣撫軍欲
遷外城民爲堅壁清野計公不可曰苗不薄會城也若

遷民而示之弱將薄城矣從之苗果平公雖出田公門而遇事不阿江南災田奏運穀助賑夸東省之豐也公密奏東省亦災穀宜留

世宗疑公負口恩沾名命白衣領職漕粟江南會雲貴總督尹公繼善入覲奏山東災重于江南事得釋入爲太常寺少卿今上登極出爲廣西按察使尋遷布政使公在山東時劾濟南知府金允彛後金弟榮爲桂林同知構公于撫軍伺公入覲劾公公歸官罷家籍沒矣天子命廣東總督策楞往訊事得釋起用爲浙江布政使浙撫常安匿災公爭之常爲總督喀爾吉善所劾疑公反劾公公官罷家籍沒矣天子命大學士訥親總

河高斌往訊事得釋起用爲江西巡撫調湖北湖北布政使嚴瑞龍老而貶公不禮焉嚴構公于總督永興劾公公官罷家又籍沒矣天子命河南巡撫鄂容安往訊事得釋起用爲西安布政使未二年薨年七十嗚呼非公清節無虧百務有條必不能行險衢如康達至於再至於三循環終身而無咎非生遇聖明亦不能太陽麗空沉冥必雪然公能知人用人能得人死力在朝卿貳在外岳牧州郡其賢者有意氣者靡不通縞紵序慇懃寡人子苟有才必折節下之嗚呼吹生排惻施摯未幾所目色提挈輩雲蒸豹變百不失一雖口者箠人皆自愧不及而公亦頗以能相士爲已任枚弱冠試鴻

詞下第落魄長安天大風雨雪衣縑單衣謁公於順治
門里第公與語奇之次日屬今學士朱公佩蓮來欲妻
以女枚以聘定辭而公憐之益甚每過必賜食且撫孟
曰母寒乎每暑必賜浴且以指攪盆曰湯未溫宜少待
是時公爲太常卿朱公亦未第事隔二十三年至今枚
爲人言猶泣下公葬邗江某原夫人吳氏祔焉子三人
長宸衡官同知次倚衡官南安知府再次采衡蔭生
銘曰悞海爲深疑山必險鬪者嘖嘖使公屯蹇公曰聽
焉禮義不愆福自天祐禍爲道遣人望巨航忽沉忽漾
誰知舟子其心蕩蕩人驚寶鏡忽涅忽磨惟其如斯光
乃益多坐如舒雁行必圉豚言無枝葉腹有精神以人

事君可謂大臣而況其才揮忽紛綸謂余不信視此銘
文

協辦大學士吏部尚書孫文定公神道碑

公諱嘉淦字錫公一字懿齋故爲太原縣民自代遷興居邑之臨河里父天黼以俠聞殺人吏持之急公年十八與其兄日行三百里出奇計脫父於獄中康熙癸巳進士雍正元年公以檢討上封事三曰親骨肉曰停捐納曰罷西兵

世宗壯之立召對授國子監司業遷祭酒再遷順天府尹工部侍郎先是工部吏奏銷爲姦公頒工程科比而先以物價咨外省督撫臨期料覆披籍而已吏相弔于家十年遷吏部侍郎仍兼祭酒事薦教習某世宗不用公爭益堅世宗擲紙筆與之曰汝書保狀來公持

筆欲下大學士某呵曰汝敢動 御筆乎公方悟捧筆叩

頭 世宗怒反縛置獄擬斬已而謂大學士某曰孫嘉

淦太戇然不愛錢可銀庫行走公出獄不抵家徑趨庫

所果親王疑公故大臣黜必嫌於懷不屑會計事又聞

蜚語謂公沽名收銀有縮無贏乃出不意笑至庫視公

公方抱持衡偏僕稱量與吏卒襍坐勞苦均共問所收

銀有不足乎曰某所收別置一所請覆之王率權良久

無絲毫縮贏如衡而止王大奇之卽爲轉奏 上亦愈

重公命署河東鹽院 今上元年擢左都御史上三習

一弊疏大旨以爲人君耳習于所聞則喜諛而惡直目

習于所見則喜柔而惡剛心習于所是則喜從而惡違

自是之根不拔則機伏于微而勢成于不可返黑白可
以轉色東西可以易位臣願 皇上時時事事常存不
敢自是之心引文王望道未見孔子可以無大過爲喻
天子嘉納之遷刑部尚書三年轉吏部尚書總督直隸
直隸旗民襍處多豪強聞公往先聲舊服引水溉田開
五百八十支河使溝水通道道水通河河水通淀交注
通洩無所滯留晉州小兒被殺同村紀某衣污豆汁有
司悞爲血刑訊誣伏最後真定府知府陳浩來自公而
勾決之 旨已下公奏雪之又奏直省酒禁太嚴以日
用飲食之故使天下驛騷非政體也弛之便一時解縲
絏者三千餘人又奏給旗人屯田墾治古北口山海關

外荒土數萬頃六年調湖廣總督前撫開橫嶺三洞議者以路太險欲棄之公曰此地於國家原無所可惜但諸苗俱入版圖而獨留此巢穴或不逞者聚焉則震驚寶靖城綏矣奏設叅將募兵鎮撫羣峒肅然調撫福建以前訊糧道謝濟世事不實免九年冬補宗人府丞公請老許之十四年召補副都御史尋遷吏部尚書協辦大學士公內峻外和相對者如登泰華坐春風非不陽和熙熙時在顏間而業已將人置青雲上雖有下界譁諉語不特不敢出于口亦并不能生於心好靜坐退食之餘一經相對兩朝聖人知公所學深能扶文運故命再督學五典鄉試兩總裁禮闈四任分校再領成均

再任翰林、掌院、教習、庶吉士、充經筵講官、行走、上書房。
又命日進經義一章、纂毛詩折衷成復。命註易傳。
家父甫畢而公病矣。門下士卿貳百辟布列中外、銘旌
歸送者、編素如雲。朝爲之空。彰益門內外車馬填塞數
十里。皆舉音以過喪。天子震悼。命皇子奠酒謚文
定公。旣負直聲屢躋屢起。晚年物望愈隆。朝中畧有建
白。天下人咸曰得非孫公耶。遂有匪人僞奏疏一紙。語
甚悖託。公所爲窮治經年。裁得主者名。天子知公忠
無他腸。寵遇益隆。而公終不自安。以爲捨他人而我假
必其致之者有自。自此食不甘寢。不寐情懷忍忍一切
所以補塞晏叅密勿者。彌口不宜。卽家庭間亦寂然無

復聞知故所狀公者止於此薨時年七十二子孝愉蔭
刑部主事堊某

銘曰繁星爛宵卿月孤明我冠盈朝儒者孤行穆穆孫
公惟嶽降靈日贊四海心醉六經摧剛爲柔惟誠故形
三揖在下九奏在廷咸有欽式閣手仰成北鎮幽燕南
臨荆楚如泰山雲膚寸而雨 皇帝曰來卿學如古古
聖有心交朕與汝汝其發明朕爲汝主公晝夜頌頌精
思採取易極連藏詩窮齊魯宵夢孔周旦質堯禹每奏
一經黃封旁午孔明淡泊豈喜聲聞無如民愛溢美紛
紛以致名尸走索其門譚語靈言直達九闕 帝曰徐
之俾是究是陳鏡涅愈瑩絲漚愈純保一个臣終始于

恩惟予小子受知最早欲永公名金石是考所聞者稀
所書者少嗚呼恐大行山高不如華表

太子太師禮部尚書沈文懿公神道碑

乾隆三十四年九月七日禮部尚書太子太傅沈文懿公薨于家余三科同年也故其子種松來乞銘余按其狀而不覺嗚咽流涕曰詩人遭際至于如此盛矣哉古未嘗有也在昔卿雲庶歌則有八伯喜起庶歌則有皐陶卷阿矢音則有召公其人皆公侯世卿非藉詩進者唐人或以單詞短句受知而目色偶及恩眷已終卽晚遇如伏生桓榮亦不過蒲輪一徵几杖一設而其他無聞焉惟公以白髮一諸生受聖人知三十年位極公孤家餐度支遠封榮祖近蔭貴孫薨後皇情紆眷賜謚賜祭賜葬賜誄贈太子太師崇祀鄉賢嗚呼如公者

古○何○人○哉○古○何○人○哉○然○而○皆○天○也○非○人○也○公諱德潛字

稿士自號歸愚吳郡長洲人弱冠補博士弟子丙辰薦

博學鴻詞廷試報罷戊午舉于鄉己未登進士入翰林

壬戌春與枚同試殿上日未昃兩黃門捲簾上出賜

諸臣坐問誰是沈德潛公跪奏臣是也文成乎曰未也

上笑曰汝江南老名士而亦遲遲耶其時在廷諸臣俱

知公之簡在帝心矣越翼日授編修屢和上詩稱

旨遷左中允少詹事與試湖北歸召入上書房再遷

禮部侍郎校戊辰天下貢士公自知年衰薦齊召南自

代而已請老上許之命校御製詩畢乃行上親

詩以賜曰朕與德潛可謂以詩始以詩終矣歸後眷益

隆三至京師祝

皇太后皇上萬壽入九老會圖形內府而皇上亦

四巡江南望見公天顏先喜每一晝接必加一官賜

一詩嗟乎海內儒臣耆士窮年兀兀得朝廷片語存

問覺隆天重地而公受聖主賜詩至四十餘首其他

酬和往來者中使肩項相望不可數紀常進詩集求序

上欣然許之于小除夕坤寧宮手書以賜比以李杜高

王海外日本琉球諸國走驛券索沈尚書詩集盛矣哉

古未嘗有也然公逡巡恬淡不矜驕不干進不趨風旨

下直蕭然繩非皂綈如訓蒙叟或奏民間疾苦流涕言

之或薦人才某某展意無所依回或借詩箴規吁堯弗

卷三

公○公○既○老○所○選○詩○或○不○能○手○定○庚○辰○進○本○朝○詩○選○體○
例○舛○午○上○不○悅○命○廷○臣○改○正○付○刊○而○待○公○如○初○此○雖○
皇○上○優○老○臣○赦○小○過○使○人○感○泣○而○亦○見○公○之○朴○忠○有○以○
格○天○之○深○也○公○嘗○訓○其○孫○惟○熙○曰○汝○未○冠○蒙○皇○上○欽○
賜○舉○人○亦○知○而○翁○十○七○次○鄉○試○不○第○乎○公○鄉○舉○時○已○六○
十○有○六○其○時○雖○觴○夢○幻○想○必○不○自○意○日○後○恩○榮○至○此○而○
從○來○人○主○之○權○能○與○人○爵○未○必○能○與○人○壽○倘○皇○上○雖○
有○况○施○而○公○不○能○引○其○年○以○待○之○則○亦○帝○力○于○公○何○有○
矣○觀○公○之○九○十○七○歲○方○薨○然○後○知○蒼○蒼○者○有○意○鍾○美○于○
公○以○昌○萬○古○詩○人○之○局○而○皇○上○與○天○合○德○先○天○而○天○

不違公之年與恩俱。亦有莫之爲而爲者。嗚呼。此豈人力也哉。公醇古淡泊清臞。立居恒恂恂。如不能言而微詞雋永。無賢不肖皆和顏接之。有譏其門牆不峻者。夷然不以爲意。詩專主唐音。以溫柔爲教。如絃匏笙簧。皆正聲也。所著古文詩各三十卷。詩餘一卷。先娶俞氏。後朱氏。均贈夫人。以庚寅二月二日薨。元和之姜村里銘曰。古松得天讓。萬木先雖槁。暴于前而償。以後澤之綿綿。則較夫早達者。轉覺羸焉。皤皤沈公。杖朝而走。帝曰。懋哉。朕知卿久。朕有文章待卿。可否殿上君臣詩中僚友。公拜稽首。老淚浪浪。從古傳人。半仗君王蒙陛下將臣。置日月旁。以星雲色爲名。姓光生論定矣。死

詩。倉。口。房。卷。三。三。
何。勿。彰。吁。嗟。乎。宮。爲。君。商。爲。臣。宮。商。應。聲。先。生。之。詩。之。
神。

江蘇巡撫雨峯徐公神道碑

公諱士林字式儒號雨峯世居山東文登縣父農也公幼聞鄰兒讀書聲慕之跪太夫人膝前曰願送兒置村塾中許之遂舉康熙辛卯孝廉癸巳進士補中書遷刑部主事知安慶府再遷江蘇按察使以失察私鑄左遷汀漳道漳俗鬪殺人捕之輒聚衆據山或請用兵公曰無庸命壯丁分扼要隘三日度其食且盡遣人深入誅以好語曰垂手出山者免如其言果遂隊出乃伏其仇於旁仇大呼曰爲首者某也立擒以徇衆驚散嗣後捕犯犯無據山者遷江蘇布政使丁父憂詔奪情巡撫江蘇公不起服闋入都

天子問山東直隸麥收如何曰旱且萎問得雨如何曰
雖雨無益問何以用人曰王獻納者雖敏非才昧是非
者雖廉實蠹上深然之補江蘇布政使尋遷巡撫未
一年病病中念太夫人年高不能迎養三上疏乞歸
上許之行至淮安薨天子震悼命崇祀賢良壽五十
有八公要路不通一刺而於鄉會師門惓惓不忘曰此
人生遇合之始也治獄如神任刑部時有二人伐木塞
外木標乙斃有司訊結矣越三月乙弟以謀殺控甲甲
逃公曰置當場死者之妻子不問而以三月後局外之
人興獄乎甲逃懼累非懼罪也甲聞卽出獄果虛知安
慶時宿松婦田氏事姑孝兄公利其產逼嫁之與羣匪

纂焉婦刎于途。詎以墜水公坐堂上見。黑衣女子嘔血。如有訴。召兄公質之。則毛髮析灑。口吐情實。公深愧。以鬼道設教。而滿庭胥隸皆有見聞。不能掩也。凡讞決憲于轅垣。絕人影射。守令來謁。具獄命判。試其才。教曰。深文傷和。姑息養奸。戒之哉。夫律例猶醫書本草也。其情事萬端如病者之經絡虛實也。不善用藥者殺人。不善用律者如之性廉儉而絕不自矜。撫蘇州時。賀長至節。天寒裘充。按察使包括以貂假公公披之。如忘涕唾交揮。家人耳語曰。此包公衣也。公大慚。謝過。少頃論公事。快揮酒如初。聽訟飢家人供角黍。且判且啖。少頃髭頤盡赤。蓋悞碌爲餽。糖筆箸交下。不復能辨。晚坐白木榻。

一燈熒然手批目覽雖除夕元辰勿輟幕下客憐之治
具邀公公猛噉不問是何膳飲其平素精神夢寐偃仰
睡涕知愛民憂國惟日不足而已故子服食居處人以
是供公以是受不容心于豐亦不容心于儉也聞覺禪
師來江南督撫將軍以下負欄矢屈膝公長揖呼和尚
繼遣海保入獄五月猶狐裘公進葛衣大府呵之公曰
罪雖重於律五月不衣裘也楚鹽不運

詔命會同兩淮鹽政核議或勸公讓鹽政主稿公笑曰
問心公私耳何嫌之避請加息以惠商時內外大臣鹽
婦不前而公章先上乃附紙尾以進其遺表曰願皇
上除弊政而毋事紛更廣視聽而中有獨斷愛民勿使

之驕用人先求其直章上人以此朱文端公云子某
銘曰昔湯文正爲政江南民化其儉苦節成甘後有繼
者諄諄訓詞民不能從且相訾訾隔五十年徐公至止
宴滄浪亭五簋而已蘇城翕然儉且中禮惟余小子憎
人講學問先生風恍然夢覺同言而信信在言前同禱
而應應在禱先至誠動物其中有天羊質虎皮類然不
然嗚呼徐公今無其倫來非戀爵去非要君儉非矯俗
仁非市恩始於立身終於事親正色爲秋微笑爲春不
愛公勤愛公之醇不敬公清敬公之真爰爲公銘以示
後人

太子少傅工部尚書裘文達公神道碑

公姓裘名曰修字叔度一字漫士江西新建縣人康熙
刑科給事中思補公之第五子也乾隆元年以廩生薦
博學鴻詞舉順天鄉試四年中進士改庶常八年天
子親試翰林擢公高等驟遷侍讀學士轉詹事府少詹
遷兵部侍郎調吏部侍郎充經筵講官軍機房行走公
貌清整眉有濃翠顧盼間精神淵映居恒喜賓客工諧
謔搜奇語怪了無倦色而遇事神解超捷每詣一曹受
一職手文書嘿然數日後判決如流二十一年王師
征伊犁公面奏軍務機宜天子大悅卽賜御衣冠
乘傳至巴里坤傳宣聖意會逆酋莽阿里克遣弟某

詭稱押送諸番探信卡倫公與哈密總兵祖雲龍縛界
總督發其姦哈密兵少有赴巴里坤種地者七百人公
請暫留爲衛撥沙洲五衛麥石添備支發其剩餘者分
散各路塘站不糴之。上皆獎許公以一書生冒矢石
行萬里外與陝甘督撫滿洲諸將軍計議密勿而能下
協邊情上符。睿算近代儒臣所未有也。調戶部侍郎
署倉場總督攝順天府尹充丙戌科會試總裁擢禮部
尚書調刑部尚書降府尹尋遷工部尚書年六十二病
噎。天子賦詩存問醫藥不絕于道加太子少傅。詔
下二日而薨。賜諡文達入賢良祠公聰強機警受大
任舉重若輕。天子愛其敏倚若股肱初爲胡中藻所

罷官逾月起用再爲捕蝗事降官逾月復故凡有事于
四方與大學士劉統勲先後奔走前命未復後命
又至半途回車竭東西雖侍內廷領六部而英蕩
歛關足迹常半天下二十三年命在工所訊邳州知
州某短發車價事二十四年命往太倉訊王閻督家
主事二十五年命往蘭州訊縣丞崔琇擅動驛馬事
二十九年命往福建訊總督楊廷璋受賄規事三十
七年命往盛京查旗地事五主鄉試一至湖北兩至
江南浙江八勘水利三至河南兩至江南四至直隸公
所讞決無苛嚴亦無縱捨衡文得士心尤善治水常奏
治水宜先審其受病之由再論治病之法就一縣一府

而言病有其處合一省而言則不然就一省而言病有其處合數省而言又不然若僅于一處受病處治之而下流之去路未清則爲患滋甚上深然之所治黃淮肥濟伊洛沁汜等共九十三河疏排濬濬貫穿原委俱有成效可爲後法善應變提若轉圜而立意矜矜偏于慈惠從盛京歸奏免過八旗生息銀爲司寇時奏免盜侵者死諸大臣或探聖意嚤嚤不前而公獨抗聲有犯無隱天子鑒其誠雖忤旨時加嚴訓不逾時恩禮如初薨之日公卿士大夫素車塞路外省之河堤老兵烟墩戍卒皆泣嘆有失聲者公本以文學受知始終與書局相終始與纂西清古鑑錢錄石渠寶笈熟河

志諸書而最後爲四庫全書館總裁 上以書法近宋

臣張卽之以內府張書華嚴經殘本 命公足成之有

奏疏詩文若干卷夫人熊氏子女各五人長子麟官編

修早率次師次行簡次豫次遵慶行簡以子與公同薦

鴻博同舉進士同官翰林同出蔣文恪公門下故將墓

來乞書碑

銘曰升龠鼎鐘器有所窮禮樂兵農事各不同裴公恢

恢兼總天工智大于身意過其道馳于文囿挖揚雅風

行于邊塞笑談兵戎以決庶獄卿月麗空以障大澤手

驅蛟龍奉 帝之命皇皇者華樂 帝之心憂國如家

指左識右帖邇安遐寧有臣如斯而堯舜弗嘉雨露方

小倉山房

卷三

三

濃梁木遽壞。白曜雖沉。寒芒尚在。葵之竺之。恩命沃
之。樹石樹藥。剛日卜之。公身雖藏。公績彌彰。丹心史
上。元石家旁。

太子太保直隸總督方敏恪公神道碑

公姓方諱觀承字遐穀號問亭又號宜田先世自元遷桐城祖登嶧工部都水司主事父式濟康熙己丑進士以本族南山集獄起全家謫戍黑龍江公弱冠歸金陵家無一椽偕居清涼山僧寺有中州僧知爲非常人厚待之公與其兄觀永往來南北營壑外菽水之費或日一食或徒步行百餘里雍正九年族人某薦入平郡王藩邸王與語大奇之情好日隆十年王爲定邊大將軍征準噶爾奏公爲記室世宗命以布衣召見賜中書銜偕往時年三十六矣十二年冬王師凱旋以軍功實授內閣中書乾隆元年詹事王公奕清薦公博學鴻

詞臨試不赴尋遷侍讀行走軍機房補兵部職方司郎

中出爲直隸清河道累遷布政使浙江巡撫公風神元

定識力超卓練其才于憂患之餘雖書生善騎射于世

事物理瑩徹通曉以故大學士鄂公爾泰勘南河冢宰

諾公親勘海塘直隸制府高公斌勘永定河俱奏公偕

行公之受知皇上亦從此始直隸饒陽婦被殺主名

不立公夢神人示以周秋二字果獲犯雪寃在浙弛綵

米之禁開墾海口大壘漲地三萬餘頃歲增雜糧十萬

石十四年授直隸總督直隸當十三省之衝每歲鑾

輿謁陵盛京避暑木蘭巡嵩嶽五臺南至江浙路

必經由加之伊犁緬甸兩度出師一切兵校往還供張

儲待百務如雲而起。公能料簡周匝。徒御不驚。二十年如一日。十九年西陲用兵。加太子太保。署陝甘總督。辦治軍需。日行四百里。得怔忡疾。仍回原任。三十二年薨。壽七十一。上聞震悼。給祭葬。賜諡敏愍。公長子用人。安放貼妥。如置器然。敦良者使柔。民聰强者使折獄。素封者使支應。迂緩者使訓士。卽其人雖不出于正。而謫詭捷黠者。亦使之刺探而奔走。甘苦必知。賞罰必信。一言必察。寸技不遺。以故人樂爲用。畿輔數千里如臂。使指捫脉。皆通。御史范廷楷林玉奏直隸丈量旗地。歷年不清。公上疏謝罪。卽奏二人剛正有才。請發往直隸補官相助爲理。上許之。旗地皆王公莊戶豪縱有年。

二人故負氣與斷斷相角。旗地稍清而二人之鋒亦少挫矣。各省督撫奉部議令民自行修城。公獨奏直隸多差。番民無餘力。且又朴野不受獎誘。修城之費請發公帑。孟子所謂用其一緩其二也。上韙其言從之。公常言事君如事天。天地無心而成化。雨露雷霆無非教也。人能常修省。于受恩之時。則雷霆乍來。轉不惑亂。而至誠所格。天心亦回。直隸旱蝗。上責公督捕不力。司道勸劾。一二州縣以自解。公不可曰。我之不職。州縣何辜。磁州逆匪爲亂。公奏誅三人。絞七人。上疑公沽名。有所縱弛。嚴旨督過。一夕間接十三廷。寄家人慮。聖怒不測。盡雨泣而公堅執前議。申辨愈力。詔解犯。

闕下九卿軍機大臣會訊獄辭與公奏一字無訛遂卒
如公議而從此上愈重公各省買穀隣僧居奇公奏
請需米處督撫密咨產米處有司代購運送可杜此弊
保雄兩府歲需駐防兵米二萬石州縣苦之公請于豫
東漕米內截運供支官民兩便所治直隸水利如永定
滹沱白溝等河奇材鷄距等泉俱爲搜考原委判別濬
築上命大臣肇公惠裘公曰修高公晉屢加相度悉
如公策加意忠賢之後在浙拜劉念臺先生像卹其家
在直隸訪楊忠愍孫文正子孫給與灘荒田畝素不信
佛而獨修清涼山廟所以報中州僧也公餘之暇譜印
範墨角尖不苟一嘖笑皆有意義某太守素倨過保陽

衙叅公坐受之出有愠語公聞之笑曰我開府二十年雖簿尉叩頭皆不受何于某太守獨不然耶某以宰相子出守郡慮其氣盛故逆折之使知朝廷儀適將謙謹以有成也不感我乃愠我耶枚奉發陝西亦過保陽公謂清遠令周君燮堂曰袁某循吏也雖宰江寧省會而能盡心民事汝等任首縣者宜以爲師嗚呼公以此知枚則公之爲政可知矣公桐城人僑居金陵在平邱時祖父母父母四代俱葬塋關外每至歲時必慟哭王哀其意爲奏請謫戍身死而無餘罪者聽其遷柩回里世宗許之遂著爲令及公貴三代俱贈如公官娶劉氏誥封夫人後嗣屢殤六十一歲生子維甸上聞之代

爲欣喜命抱至御前解所佩金絲荷囊賜之公雖貴手
不釋卷好吟詩有宜田彙稿松漠草諸集纂河渠考若
千卷辨明水經注澄水之非缺漢書註洳水之非增皆
勤學經生所不及也墓句容之胄王山

銘日月之初生蒼蒼涼涼及乎中天衆星無光方公未
遇險艱備嘗豈知天意大任方將邊風塞雨濯滌肺腑
擔簦往來固其筋骸操心慮患旣危旣深一朝遭際百
鍊精金牙纛旌麾若固有之彤弓湛露從容賦詩復章
鵲章山陸驅馳醢泉鬚河樊謀輔志六秉三衡功罔不
濟操舟舵穩負重肩牛所謂棟梁不搖不撓無怖斯靜
無戀斯定先民有言動心忍性哀榮終始位極人臣基

于祿命成于精神軍民勿悲公死有歸欲知偉烈請觀
豐碑